

中國佛寺志叢刊

趙樸初



清・馬元 釋真樸重修

曹溪通志(下)

廣陵書社

曹溪通志卷之五

三韓馬 元子貞

重修

吳門汪永瑞緘庵

古岡釋真樸雪標

毘陵史樹駿庸庵

訂正

曲江劉學禮修五重鐫

塔記類

唐

法性寺菩提樹髮塔記

釋法才

法性寺住持

佛祖興世信非偶然昔宋朝求那跋陀羅三藏建茲

戒壇預識曰後當有肉身菩薩受戒於此梁天監元年又有梵僧智藥三藏航海而至自西域持來菩提樹一株植於戒壇前者立碑云吾過後一百六十年當有肉身菩薩來此樹下開演上乘度無量衆真傳佛心印之法主也今能禪師正月八日抵此因論風幡語而與宗法師說無上道宗踴躍忻慶昔所未聞遂詰得法端由於十五日普會四衆爲師祝髮二月八日集諸名德受具足戒旣而於菩提樹下開單傳宗旨一如昔識法才遂募衆緣建茲浮圖瘞禪

日落成八面嚴潔騰空七層端如踊出偉歟禪師
法力之厚彈指卽遂萬古嘉猷巍然不磨聊叙梗概
以紀歲月云儀鳳元年歲次丙子吾佛生日謹識

此碑見存廣東省城光孝寺菩提閣下乃唐刻也

宋

重新祖塔記

僧奉寧

紹興三十三年
始差本寺住持

六祖大鑒禪師寶塔崩於唐先天年間元和中憲宗
賜額曰元和靈照之塔皇宋開寶初王師平南海劉
氏殘兵作梗遂爲煨燼尋有制興修功未竟會太宗

卽位留心禪門詔遣郎中李頌司徒張公前來措置
重新建造工畢上奉御筆賜額曰太平興國之塔至
紹興二十四年甲戌歲十二月十五日復罹回祿之
變奉寧庚辰春准勅差住持當山於壬午歲三月丁
酉朔十五日辛亥募緣鳩工鼎新建造奉寧忝繼祖
芳謹次其實所將功德上祝當今皇帝聖壽無疆聖
文睿武掃蕩妖氛恢復故基廓清天宇萬邦道泰四
海昇平文武官僚增崇祿位風調雨順稼穡豐登

慈濟大師壽塔記

余靖

天下伽藍以夏臘繼承率者蓋萬數焉出郡縣之介
選於州鄉以領其徒者且千數其名山福地奉朝廷
之命釋於叢林以闡其教者無數十焉菩提達磨心
法東傳以衣爲證止於大鑒故曹溪之比又加少焉
今皇帝嗣統之初地奉母儀內助之慈尊釋氏西來
之教詔於衡廬擇人紹隆祖席僉曰當今雄辯通識
無踰雲蓋禪師湖南按察司卽以名聞詔賜命服師
號以寵之俾擇名僧自佐禪師名寶緣興元人遊方
至隨州參智門禪師祚投針契理得免忘言以心印

心不煩機接遂爲之嗣卽雲門之嫡也尋領衆居唐
興雲臺雲蓋皆南嶽之名藍也點空破有不涉名相
臨鋒迅發直示宗乘諸方稱服謂之禪窟故詣旨求
人無敢先者駐錫茲山殆將逾紀一音演說四方流
布衆中得法而去者多爲人師其機緣語句門人各
著序錄此不復記教門崇建規制鼎新可謂祖堂中
興矣旣而嘆曰嘻止矣佛言世間出世間法備矣山
河大地有時而盡況于人乎雖性空無着體質當有
所歸愚夫以死爲諱小乘以涅槃爲樂皆非中道吾

其營壽藏以安時處順可乎旁鑿竈道上爲宰塔在
寺之西南二里而遙因僧惠實磨石乞銘以志之其
銘曰拘士煩思以身爲累達人靜觀如幻之寄花葉
盛衰根性不驢見聞覺知豈藏於斯

元

古衲和尚舍利塔記

雲從龍

廉訪使至
正辛卯

舍利一名堅固子一名金剛子按經所載過去諸佛
入般涅槃閣維金身所獲舍利其數甚多五色絢爛
至堅至剛當時見者天龍鬼神人及非人莫不頂禮

讚嘆希有隨力分取各於其國建大寶塔如佛在世
恭敬供養如此舍利是諸如來大堅固力大般若智
大光明藏大圓覺海之所從出非小根器之所能有
乃知此事亦是了達生死具正知見之印證也佛之
教法自入中國學者甚衆得者甚寡舍利之見世爲
希有何以故爲其所學非正法故不守戒律不修禪
定講說持論見聞覺知作有漏因每以聲聞外道趨
向爲極則事是故達磨一輩西來憫念學者迷惑錯
亂失其本心盡反前轍不立文字直指人心見性成

佛初傳衣鉢于二祖可五傳至能衣止不傳所傳者
唯心爾始岐而二繼離爲五枝分派別彌滿天下而
南華實宗主之蓋以祖師衣鉢在故歷代主僧例無
其人意觀於海者難爲水也六百餘年後有李氏子
者出江人生而淳長而樸不解世諦不紹家業尤不
喜文字學切慕草間桑下之樂父母不能禁許令出
家祝髮於韶之華嚴院法嗣風旛之僧曰祖宗出世
住月華住大鑒每以平常心接人人或易之師曰個
事不在筆端上不在口角頭顧心地何如爾後住南

華適丁亥運遷革僧徒逃難西來衣鉢爲有力者負之而去師惟隻影煮折脚鐺兀守祖師真身於窮山虎狼叢中終不退轉事甫定則物色衣鉢旋聞有獻于上者已仍奉旨給還師頂授復歸西天衣樓永爲鎮重方且匡徒領衆隨宜說法續曹溪一脉生意偶劇盜游至鎮山之珽常住金谷席卷一空方且殺戮焚蕩宛炤日熾衆皆危懼師與其徒奉祖師并衣鉢出避入郭相時爲歸計至元二十八年八月初三日祖師諱辰忽示微疾次日子時謂弟子曰世緣已畢

沐浴更衣索筆書偈曰六十五年佛法罔然浮雲既散月現碧天書畢踟蹰而逝其於臨死生之際可謂了了者矣越月茶毘得舍利十餘色若紫玻璃叩之聲鏗鏗然作金玉聲此非平昔踐履真實見趣透徹得大堅固力果能如是耶弟子法泳等塔而藏之屬予爲記予曰達磨之教不立文字何以記爲請益堅辭不獲因述其顛末云師名法遵號古衲銘曰伊佛之法自西徂東其大無外其傳靡終佛佛相承心心至通惟我遵公得法于中非言非默若晦若蒙靈光

內照心鏡昭融不衣不鉢遠紹祖風出入無流珠
耀空植塔曹溪佳氣鬱蔥瘞庵骨于不朽而其所以
冥會默契于過去諸佛者又奚窮

碑銘類

唐

六祖能禪師碑銘

并序

王維

無有可捨是達有源無空可住是知空本離寂非動
乘化用常在百法而無傳周萬物而不殆鼓洩海師
不知菩提之行散花天女能變聲聞之身則知法本

不生因心起見見無可取法則常如世之至今人有
證於此得無漏不盡漏度有爲非無爲者其惟有曹
溪禪師乎禪師俗姓盧氏本貫范陽人也名是虛假
不生族姓之家法無中邊不居華夏之地善習表於
兒戲利根發于童心不私於身臭味於耕桑之侶苟
適其道道行於蠻貊之鄉年若干事黃梅忍大師願
竭其力卽安于井臼素剝其心獲悟於稊稗每大師
登座學衆盈庭中有三乘之根共聽一音之法禪師
默然受教曾不起予退省其私迴超無我其有猶懷

渴鹿之想尙求飛鳥之跡香飯未消弊衣仍覆皆曰
升堂入室測海窺天謂得黃帝之珠堪受法王之印
大師心知獨得謙而不鳴天何言哉聖與仁豈敢子
曰賜也吾與汝不如臨終遂密授以祖師袈裟謂之
曰物忌獨賢人惡出己予且死矣汝其行乎禪師遂
懷寶迷邦銷聲異域衆生爲淨土雜居止於編人世
事是度門泥農商於勞侶如此積十六載南海有印
宗法師講涅槃經禪師聽於座下因問大義質以眞
乘旣不能酬翻從請益乃嘆曰化身菩薩在此色身